

Partida socialdemocratica: Agir enstagl sa lamentar

Propostas en vista a la dieta da la Partida socialdemocratica da sonda proxima ad Arosa

DA MARTIN CABALZAR

■ **Cun vehemenza e success ha la Partida socialdemocratica dal Grischun cumbattì la candidatura per Gieus olimpics d'enviern a San Murezzan e Tavau. Ussa pretenda la Partida socialdemocratica ina vasta debatta davart la dumonda co il turissem grischun po vegnir sviluppà vinavant era senza l'olimpiada. Il directori propona tschintg projects che possian vegnir instradads immediatamain da la regenza.** Tenor il parsura da la Partida socialdemocratica *Jon Pult* è il na a l'olimpiada ina schanza che sto uss vegnir nizegiada per analisar e discutir en tge direziun il turissem grischun duai sa sviluppar. La ps saja conscienta da sia responsabladad ed animeschia perquai tut las forzas politicas da cooperar en quest process enstagl da tschertgar culpants e sa lamentar.

Dieta da partida ad Arosa

Questa fin d'emna vegn la Partida socialdemocratica ad organisar ad Arosa ina dieta da partida che serva sco impuls per questa discussiun. Il directori vegn a preschentar als delegads in palpìri da discussiun ch'intenda da promover il svilup turistic en il Grischun. Sco quai che Jon Pult punctuescha vers La Quotidiana na sa tracti betg d'in concept da svilup definitiv, mabain da projects politics concrets che pon e duain vegnir realisads immediatamain da la regenza.

«Sche il Grischun vul in avegnir prosperaivel na dastga el betg promover il gigantissem e la chatscha sin subvenziuns, mabain sa basar sin las atgnas fermezzas», di Pult. Quai sajan qualitat ed amiaivladad en il turissem, varietad en art e cultura, bellezza da natira e cuntrada, ideas innovativas en l'economia e tar las infrastructures sco era persistenza



Jon Pult: «Suentar il na a l'olimpiada vul la Partida socialdemocratica ir en l'offensiva cun la promoziun dal turissem en il Grischun.»

FOTO O. ITEM

e niz durabel en tut las domenas da la vita. Ses palpìri chapescha la ps sco contribuziun a la discussiun davart l'avegnir dal Grischun.

Letgs chauds empè da letgs fraids

Il gea dal suveran a l'iniziativa davart las abitaziuns secundaras haja midà radicalmain il model da fatschenta per l'industria d'esters en il Grischun, di Pult. Empè da far profit tras la vendita da terren ed uschia mangiar engurdamain la cuntrada e producir adina dapli letgs fraids stoppia la branscha turistica promover en l'avegnir ina meglra occupaziun da las abitaziuns existents, modernisar e sanar energeticamain las pusavladads da pernottar existents. «Oc-

cupaziun e sanaziun empè da vender e betunar», è la devisa dals socialdemocats. U per dir cun *Hanspeter Danuser*: «Nus stuvain puspè vender il latg e betg la vatga.»

Per cuntanscher questa finamira dovri tenor Pult in plan da master per il turissem da noss chantun che sorta d'ina clera analisa e che cuntegn mesiras concretas co ins vul transmetter letgs fraids en letgs chauds e co ins po garantir la finanziaziun da la hotellaria e dad autras infrastructures turisticas. La finamira saja da pudair occupar las abitaziuns sur l'entir onn. La stagiun d'enviern restia impurtanta, dentant er il turissem da stad gudognia muntada ed haja anc gronds potenzials.

Promover las atgnas fermezzas

«Noss turissem sto esser autentic e resguardar cunzunt er ils basegns da la populaziun indigena», punctuescha Jon Pult. Il masterplan stoppia sa focussar sin las fermezzas dal Grischun. Quai sajan la bellezza cuntrada alpina, las magnificas cuntradas naturalas e culturalas, la buna infrastruttura da traffic, arranschaments attractivs da stad ed enviern. Ils socialdemocrats vulesan expressivamain promover vinavant ils suandants arranschaments: Cuppa Spengler, il Campiunadi mundial da bob, Tour de Ski, il Maraton engiadinais, la Cuppa mundiala ed il Campiunadi mundial da skis 2017, Maraton alpin, Cursa da velos Cuir–Arosa, il Parc Naziunal, il project Parc naziunal

Adula sco era differents parcs naturalis regiunals. Betg da tralasar sajan plinavant ils patrimoni mundials sco il trajet Alvra-Bernina da la Viafier retica, l'Arena tectonica Sardona, la claustra da s. Jon a Müstair e la varionta cultura cun ses renumads arranschaments. Tut questas purschidas stoppian vegnir offeridas meglier en il rom d'in plan da master turissem e vegnir colliads ed economisads meglier sut la marca «Grischun»

Investiziuns en la cultura

Tenor Jon Pult è la separaziun da cultura ed economia fallada. Gist il turissem sco il pli impurtant factur economic dal Grischun possia profitar da la varietad culturala da noss chantun che saja ina gronda attracziun turistica. Pult enumerescha en quest connex renumads artists sco Giacometti, l'architettura, litteratura en trais linguas, la gronda activitad da chant, musica e teater. Il chantun stoppia elavurar criteris e mecanissem per promover pli intensivamain la cultura.

Tariffa d'indigens per l'entir Grischun

Jon Pult è persuadi che «la tariffa grischuna per indigens» pudess carmalar dapli skiunzs e snowboarders sin las pistas grischunas. Ils pretschs d'ir cun skis sajan daventads absorbitants cunzunt per famiglias, las frequenzas da las pendicularas tshessian. Urgent saja da realisar quest abunament en cumbinaziun cun il traffic public.

La Partida socialdemocratica pledescha plinavant per ina nova strategia da qualitat en l'agricultura e lantschas ulivas per il turissem. Per quel intent duaia vegnir negozià da nov davart la cunvegna agrara cun l'Uniun europeica. Plinavant duaia era la colliaziun integrala dal Grischun cun la rait da telecomunicaziun sur fibras da vaider vegnir intensivada.